

Deshalv spill mer he - BAP

Quelle und Übersetzung: www.bap.de

Refrain:

He du do - un du - wann ess et he su wigg,
Dat mer de Muhl opmaache darf, wemmer jet saare will,
weet höchste Zick,
dat die Versteckspill-Rejel niemeh interessiere,
't weiß jeder längs, wat üch un uns bedroht
un wer't noch nit weiß, soll et endlich hühre,
dat woll mer fiere - grenzenlos.

Kütt ruisch näher un hührt zo,
die drei Strophe he sinn janz speziell für üch.
Worümm mer he sinn, ess womöglich nit janz klar,
su wie't och secher ess, dat ei Leed nit jenüscht,
öm all die Vorurteile affzebaue, die sick drissisch Johr
vun Kahle Kreejer huhjeschätz en Ost un West,
weil't ess schön simpel, wenn och jrausam, wemmer alles wie bisher
en e schwazz weiß un gut un böse Schema presst
Wie off schon hann se üch un uns domet beloore,
die Angs jeschürt en Bundeswehr un Volksarmee,
uns wo't jing öm jed Jemeinsamkeit bedroore?
Domet dat ahnfäng opzehühre spill' mer he.

Wo mir herkumme weet et kälder Daach für Daach,
't sinn Pharisäer, die sich Christe nenne, draan,
doch wer sich wie nennt ess bekanntlich jo su'n Saach,
loss uns nur Minsche sinn, ob Frau, ob Kind, ob Mann.
Mer spille he, öm üch ze treffen, selvs ze spüre, wat he loss ess,
Hann uns ejene un kein jespaldne Zung,
sinn nit op Beifall uss der falsche Eck scharf, nä, mer wolle bloß
beim Klartext blieve, ohne jed Beschönigung.
Mer sinn jespannt op jede Schwester, jede Brooder
Vum Erzgebirge huh bess zur Ostsee,
vun Eisenach bess Frankfurt ahn der Oder,
Mir freu'n uns wie bekloppt un deshalb spill' mer he.

Un nochnet, falls et nit schon ohnehin bekannt,
dat ahn die Klique, die sich "Volksvertreter" nennt:
Uns kritt ihr vüür kein offizielle Kahr jespannt,
he, wo jet andres unger unsre Nägel brennt,
denn mir hann Frönde he, die hann kein weiße Duuv op blauem Grund,
die hann ne Schmied, dä mäht e Schwert jraad zo nem Plooch,
en SS 20 zo nem Traktor un en Pershing zo ner Lok,
die hann vum Rüstungsschwachsinn su wie mir jenooch,
't sinn Pazifiste ohne wenn und aber,
ohne Hingerdühr, die saare "Nä",
die hann - wie mir - die Naas voll vun dämm janze Laber,
janz besonders für uns Frönde spill' mer he.